

煙霞萬古樓文集

一



中華書局

煙霞萬古樓文集

一

王曇撰

煙霞萬古樓文集

二

王
雲
撰

中
華
書
局

叢書集成初編

煙霞萬古樓文集 二冊

中華書局出版發行

(北京王府井大街三十六號)

秦皇島市資料印刷廠印刷
一九八五年北京新一版

開本：七八七乘二〇九二毫米三十二分之一
統一書號：一七〇一八·一五一

故孝廉王君仲瞿奇才也。嘉慶二十一年七月。嘗偕余遊雲臺山。同客海州刺史師禹門幕中者三閱月。仲瞿之學。無所不窺。而尤工於駢體。直可壓倒齊梁。余戲題其詩文藁後云。斗牛之光。芒角四起。河海之水。縱橫萬里。似戰國策。亦韓非子。二千年來。無此才矣。或又謂仲瞿之作。真如決汝漢淮泗而注之江。合金銀銅鐵爲一鑪者也。仲瞿好游俠。兼通兵家言。善弓矢。上馬如飛。慷慨悲歌。不可一世。嘗謂余曰。吾死後必葬我於虎邱短簿祠側。乞題一碣。曰。晉故散騎常侍東亭侯五十三世孫王曇之墓。其好奇如此。嗚呼惜哉。平生著作甚多。有經解三卷。史論三卷。西夏書四冊。洪範五事。官人書五類。本分歷代神史一百卷。仿班固漢書例居今楮古錄二十卷。讀竺貫華三十卷。繙帛集一百卷。傳家六法一卷。隨園金石考四冊。煙霞萬古樓文集四十四卷。計散體六卷。四六文六卷。本集十六卷。外集十六卷。又歸農樂傳奇九齣。玉鉤洞天傳奇四十八齣。萬花緣傳奇四十八齣。遼蕭皇后十香傳奇十二齣。魚龍變傳奇四十八齣。俱未刻。僅刻駢體文六卷。亦殘闕矣。仲瞿既沒之二十載。余始集其文而傳之。爲述大略如此。道光十有八年孟夏。旬吳錢泳書。時年政八十。

16W7/05/01

煙霞萬古樓文集卷一

穀城西楚霸王墓碑

秀水王曇仲瞿氏一名良士

乾隆五十九年。觀察秦武臨兵備。督山東全省糧運。前守濟南泰安府知府。長洲宋思仁。繕畢泰山馳道。種補天門上下長松。溝泄穀城水利。遂封樹於西楚霸王之墓。周方一畝。土階三等。屬其友人王曇爲文。惟王廡馬祥車。月矢日弓。臨汝江陽之戰。吳興廳事之中。一牛醢血。百騎騰風。王何神於蘇侯。蔣帝而不神於蕭琛。孔恭臣知王魂安卞山。死羞魯公也。王以漢五年葬穀城。魯生制服。漢王臨哭。獄抱峯藏。汝回隧曲。談書遷筆。魯經史例。三皇五帝。楚書本紀。作者謂有大王之江東八千子弟。有孔子之廟堂車服禮器。佞臣班固。竇憲筆奴。爲葉公龍。爲史公豬。沈魂狴犴。置書葫蘆。臣知大王不愛平分之天下。而忍殺手版之腐儒哉。而竊爲大王幸。幸王不葬臺泉。雍宮祈年。家驪籠。陰盤藍田。魚膏照尸。亡羊燒山。臣竊笑漢皇帝長陵坏土。高廟玉環。呂后淫屍。赤眉入關。而王陶人茅馬。紙衣瓦棺。斥上無將軍之金。復土無校尉之官。南山鐵固。石槨泥丸。臣竊笑漢子孫。茂陵。原陵。闕地及泉。園郎。寢郎。邑瓦無烟。玉衣出柙。文園盜錢。作昌陵。便房方中。斲紵絮。陳漆其間。校尉摸金而入。鑿。郎將發邱而破穿。而大王佳城鬱鬱。萬鷺銜泥。羣

烏耘田。壽於櫟陽萬年也。嬴趙毒螫。陳田淫虐。王燒秦宮室。夷齊城郭。復春秋九世之讐。報戰國六王之惡。食敖倉。戰京索。方將斬紂而自王。何云入關而背約。宋義走卒。項氏通將。背武信而沮援。誑高陵而賺賞。陽將楚軍。陰爲齊相。幸君之敗不忠。居軍之右不讓。搏牛破虱之談。驕一軍而跋扈。猛虎貪狼之令。殺諸將如反掌。王不斬莊賈。難爲積戾。不戮揚干。誰爲魏絳。牧奴孫心。芻狗兒戲。義非孤注。名類奕棋。如陳涉之號。扶蘇原非太子。或陽虎之竊。狀貌聊借豪魁。楚方借而而弔喪。心乃尸居而餘氣。飾箏琶之爪者。義甲。髡禿婦之髮者。義髻。擁之則爲懷王。去之則爲義帝。曰取則取。曰廢則廢。大王方端冕以禮犧雞。祝宗以拜牢餼。而敢肩尻乎雕俎之上。縞素乎三軍之士者。漢王之詐也。榮仇不封。餘去無功。王諸將善地。則忠。王故王醜地。則公。漢方佩我關中之印。而奸我三秦之盟。樓煩則噴。楊喜則驚。質淫雉於軍中。不御。置太公於高俎。不烹。鴻門不殺。鴻溝不爭。而漢敢劫兵以犯我彭城。漢爲魚肉。楚爲刀俎。智不鬪。雖水流。力不伏。廣武弩。虜魏王不仁。梟塞王不武。滎陽西拔。靈壁東破。怯則銷六國印。懼則說九江布。張良如廁。始爲逃人。紀信乘車。終爲降虜。漢之十罪。臣不屑數也。爲天子不忠。報漢以桮羹分之太公。爲天子不仁。報漢以軀骨醉之戚夫人。爲天子無禮。報漢以不類如意之惠帝。爲天子無義。報漢以慙不可言之審食其。擁帶不孝。顏羹不弟。墮二子車不慈。死一婦手不智。而大王七十戰之功。十七王之封。亘六帝四王而無窮也。宛邱太皞。濮陽高辛。黃帝橋山。唐帝穀林。九疑舜冢。苗山禹墳。湯無葬處。或曰汾陰。衡山二妃。鮪

魚九嬪。虞則烏江。王則穀城。臣謹案。般人以柏。夏氏以松。將軍之樹。大王之風。銘曰。

盤古葬魂。大王葬身。魂爲雷霆。身爲風雲。皮毛爲草木。髮髭爲星辰。頭爲東嶽。左臂爲衡。足爲西嶽。右臂爲恆。喜爲晴。怒爲陰。精髓爲玉。齒骨爲金。江河其血。地里其筋。眼爲日月。蛆蟲爲黎民。三百里海南之墓。周一畝大王之墳。

班固父子之廢項王本紀。微特王之罪人。亦孔子之罪人也。滅六國。燔六經。項不滅秦。而魯之廟堂車服禮器有存焉乎。魯諸生爲王三年服。城守不下。尊孔也。非私項王也。司馬遷以項王功高。故加於孔子世家之上。而進之三皇五帝殷周之後。固何人斯。而黜王本紀。宜其獍狴犴死。而王之神靈。亦於是乎暗啞咤叱。三百年於吳興之堂矣。漢章帝以班固爲葉公龍。鄭漁仲以固之比遷。如龍之與猪。其信然歟。是碑作於二千餘之後。蓋斷自二千餘年以來。無此手筆。東京寶光錄

蟻磯孫夫人廟碑

蟻磯有廟。俗相傳爲吳大帝妹孫夫人。殉蜀主白帝崩聞。以黃武三年薨於此。吳書簡略。夫人與全公主大小虎無傳。失春秋內女致聘歸寧卒媵之例。案蜀志。進妹固好。不紀年月。大致在建安十三年十二月。赤壁破魏。蜀主牧荊州之十四年春。婚於京也。吳后傳。先主旣得益州。而孫夫人還吳。亦不明敘。所以還吳之故。則法正已進瑯妻吳氏於宮。舟船之迎。夫人見幾作也。是歲爲二十年。權襲取長沙三郡分界連。

和之日。可想見蜀主與夫人蓬豆同牢。七年主祭矣。陳壽所以有綢繆恩紀之筆也。廟無石。吳不知夫人之德。史無文。蜀不知夫人之仁。於是懲裴松之失。以補史官曰。

某聞殺龍蛇以祀川岳者。句踐之獻美人也。遇嫫娥以筮有黃者。成湯之嫁帝妹也。權之壻備。譬非塞庫。必無瞋目噬宜生之謀。事類師昏。亦斷不作反斗擊代王之計。大意謂吳蜀不爲一家。則一鼎三足不立。東西不主二帝。則一槽三馬難平。周郎之意。以爲婚姻者。春秋之王道也。縱橫者。戰國之長城也。橋公二女。皆嫁英雄。破虜四男。尙無佳壻。孫夫人之侍婢弓刀。亦猶甄夫人之借兄筆硯也。何也。破虜天下豪也。夫人將門子也。親見皇甫夫人以文武忠臣之妻。死刀圍而罵董卓。蔡文姬以徒行乞命之身。跳蓬首而拜曹公。生女如鼠。強臣若虎。峴山之父仇未報。小女不敢反龐娥之兵。許貢之兄讎未洩。女弟不能釋姊嫠之仗。此所以逐馬褰囊。翔鷗鴈鏑。大眼戎粧。小妹雍容。追隨於猢猻虎家兄之馬後。而史以爲驕豪多將。吳吏兵者過也。女子母教也。吳夫人助桓王軍國。疇不知訓井家風。大皇帝愛趙母文才。況又有宮中師傅。是蜀中三尺童子。皆知夫人文武兼資。禮義足智矣。而法正佞人也。賊舊君以賣國。譚新主以潰倫。理妻。吳漢中王之宗婦人也。時也。關嚴道。銅梁。祭武擔。石鏡。夫人方將媾補漢天。夔鳴炎鼓。張錦繖以定羌涼。持赤節以平懿丕。而王已隗囂天水。子陽白帝。坐大之勢未安。構木之心遂蕩。伯明就后羿之室。闔廬居子建之宮。謂鄭多父貪鄩國夫人。利其土地。則吳非小君。謂晉文公矐子圉懷贏。感其沃盥。則吳豈秦

援姐已以賜周公。曹操之所不收。寡婦何知社稷。孫后以爲可笑。此習鑿齒所謂匹夫猶惡無禮。惡法正惡漢王也。夫人剛猛人也。無鹽薦枕。不取娛於好色之齊王。嫫母清宮。徒見忌於無情之黃帝。勢將醉飾唐姬。則烈女不能事亡國婦人。將糜爛望卿。則高明又必失中宮大度。與其椒房散號。口戰銀刀。左右英娥。心寒粉陣。使漢中王東帶自稱下官。耳順強呼娘子。芒刺在背。交戟入頸。以魚水夫妻爲戎狄。以酣睡臥榻爲他人。外揚高帝幃薄不脩之名。內彰孝文衽席無辨之醜。穆姜且豫卜東宮。雲臺亦自疑霧露。賊貓呂鼠。勝負未可知也。呼阿斗而告曰。深山大澤。余恐生龍蛇以禍汝也。善事漢王。不暇刺促顧婢子語矣。於斯時也。腸繞吳門。魂啼蜀鳥。夫人行矣。某獨笑趙子龍官宦也。左轂鳴。則雍門狄爲之請死矣。樓船御。則薛廣德爲之頸血矣。雲無張良能羽翼太子之功。而有薏越實亡君夫人之罪。牽孺子爲牛之小恩。而率與愛子投車之大衆。扈當陽坂一抱零丁之弱子。而凌犯長秋宮七年大歸之小君。且以此舉截江留斗。爲大有名之師。足摠發吳人一笑也。雲試思愼夫人走邯鄲之道。袁盎如何卻退。晉穆羸抱太子而啼。趙盾可曾豪奪。借使夫人繡旗一怒。武帳珠襦。鼙鼓三中。水軍將令。呼孟勞而侍女刀光。叫餘皇而長裘溜棹。則其時。艤艦藏兵。白衣而呼警者呂蒙也。艤衝脫繼。暴風而二拒者董襲也。招以北風。丁奉之帆。登岸皆升城之督。麾以舵樓。谷利之令。上山皆白棒之兵。而夫人敬以鼓角勞軍。旂門受詔。蹕前周泰。縑蓋先鋒。馬後虞翻。持矛步從。雲能以一身之膽。納百婢之刀乎。吾恐張飛僅能瞋目橫矛。以決死據長坂。

橋不能牽人斫頭以沙囊斷長江流也。蓋其時權且大遣舟船迎妹而夫人慟哭也。知夫人必以太子歸吳何也。魏略。禪以建安十六年身賣漢中。父事劉括。禪年數歲竄匿。隨人西入漢中。爲人所賣。及建安十六年關中破亂。扶風人劉括。避亂入漢中。買得禪。聞知其良家子。遂養爲子。與娶婦。生一子。初禪與父相失時。識其父字元德。比舍人有姓簡者。及備得益州。而簡爲將軍。備遣簡到漢中。舍都邸。禪乃詣簡。簡相檢。訊事皆符驗。簡喜以語張魯。魯乃洗浴送詣益州。備乃立爲太子。據魏略以爲建安十六年事。則在十三年趙雲抱太子之後。使其時杵嬰不識趙孤。書退勿呼父字。則十三年趙雲長坂之功。又委棄字於牛羊乳鬪文於邱虎矣。幸而方望真人能留孺子。華陽奇貨得歸異人。夫人念嬰婉於伊水。此兒久付空桑。失抱帝之膝公。諸將誰爲擁樹。寧使漢家有烹羹置俎之太公。不可使劉氏有白板青衣之太子。與其吳鴻扈稽呼著父胸。孰若石紐塗山藏諸母腹。與其趙嬈胡組。誤二漢之保阿。孰若遜抗機雲。親三吳之師傅。在英雄不顧妻孥。龍種豈無媼母。況孔甲有此乳兒。阿蘇何非己子。其挾以歸也。留震宮長子東方。免秦密天頭西顧。秦康公之爲晉甥。非長安君之爲趙質也。而况阿斗者。甘后之玉人。又二兄之鼻涕。聖公升殿俯首羞慚。盆子探符。汗衣欲哭。夫人憫齊歸早死。雖然稠有童心。望周子迎京。或者悼能霸晉。且后緒自計。歸仍子疆。不曾廢母。則安知不六后臨朝。身猶故劍。四帝外立。留此前星。已不沙潏豕牢。人免薰君丹穴。此夫人嗽乳捫天。推乾就溼也。乃漢王始以孟子諱吳。終以向姜絕莒。不留堯母之門。忽絕鄧甥之好。謂妻妾必得陰麗華乎。則惟斯人乃有斯婦。謂生子當如孫仲謀乎。則無此舅焉有此甥。而蜀之人。乃以爲趙王歸漢。如意之酒必酖。燕丹機橋。太子之烏必白。則孫夫人非呂太后。吳大帝豈秦始皇耶。曰。使

趙雲勒兵斷江。魏晉春秋之言。侯臣法正之謀也。曰。與張飛勒兵截江。趙雲別傳之言。非丞相諸葛之策也。時正爲軍謀主。亮所謂正能制主上。亮不能制法正。故曰非亮罪也。太公之法曰。一女子當百丈夫。又曰。理四海如妻子。故孟津用婦人與周。孫武戰宮人勝楚。由余未霸。小戎以女子譏兵。蚩尤不禽。元女以南車教戰。世能祖祖。鮮能將將也。而况吳多謀士。蜀無將才。使夫人以定姜卜戰之龜。灼銅雀金臺之兆。以馮嫪詔使之節。渚分香賣履之宮。將見西掛闕氏。魂褫冒頓。北呼公主。馬抱烏孫。割長江而讀甥舅聯盟之碑。開玉門以鑄外孫單于之印。許馬懿巾幗來朝。使甄后掖庭贊拜。而後東封呂範之妻。歸拜張昭之母。江東衣錦。炎漢重興也。而乃鼎未三分。商亡一物。夫人遜國。淫后如宮。使虎威南郡。忿興拜賜之師。伯言夷陵。怒報泛舟之役。而猶謂楚文荆尸。勿因息媯。齊桓伐楚。不爲蔡姬。吾不信也。向使夫人身不歸吳。計能鎮蜀。則長沙零桂。焉知不三索來歸。雲長益陽。又何必單刀去會。罷巫峽七百里之屯。唾瓠亭四十營之火。全琮陸遜。安敢輕挑。黃蓋韓當。豈能平視。箠使吳兵。鞭敲蜀將。又何必西增白帝之兵。東益巴邱之戍哉。亮書曰。主上之在公安也。外慮曹操孫權之逼。內懼夫人肘腋之憂。曰在公安者。言初婚至京。一卮鴆酒之夫人。非于飛入蜀七年牀第之夫人也。某聞春秋之義。忿不廢親。怨不滅德。殺陵尙報秦施。城濮不忘楚惠。蜀主乃不念敗亡。樊口棄其室家。奔聞柴桑。未諧昏媾。吾江東先之魯肅。但有蒼梧遁跡之言。詢之孔明。惟有披髮山林之請。而其時。甘皇思血飛小沛。有狐誰綏。曹丞相筆落許都。荊州誰借。設

孫將軍或有趙襄夏屋之忌。孫夫人不守季平一負之仁。借弟姊以靡笄。中鑿鑿於智伯。則吾江東帳構之銅。皆專諸之鉞也。夫英雄之見。助夫不非慶女。殺夫亦是雍妻。而卒使齊姜返國。無煩蠶妾之謀。媒妹于歸。不浴龍工之藥。則可知西施越絕。斷無種蠶陰謀。昭君和親。不是漢宮祕計矣。乃蜀主恩忘齊大。陰輕子忽之援。義蔑秦嬴。伴忍先軫之唾。此吳國君臣。寧以盤郢之劍送死女。不以女膝之口食殘魚也。夫人蓋以有生。日爲未亡人矣。讀魯史。孔子以彭城予宋。非予宋也。通吳援也。虎牢予鄭。非予鄭也。脩楚戰也。吳無荊州。而巫峽之援不通。吳無荊州。而濡須之陽難戰。是吳以一女初婚。失三江大局矣。吳爲索地。蜀實負人。魯橫江所謂。凡夫不忍行。而况整頓人物之主者。非怨語也。洎乎臨沮敗好。豈寇歸元。白帝脩盟。張溫報聘。安知非哀姜哭市。內椎敦后之環。綠衣拜勤。外解宋王之閉。而能敦舊乎。夫自古處女爭桑。尙開邊釁。焉有呂姜斷髮。不啓鄰仇。在夫人埋璧情深。服薪怨小。謀桑不霸。就木徒甘。輟聲已帷堂。不視之哭。應意其畫紙埋人之識。漸臺水沒。萬里江長。杞國城崩。千年蜀破。娥皇無子。堯母無夫。伊可憫也。嗚呼。白狐九尾。開山啓母之魂。暴雨飄風。杜宇鵲禽之血。讀華嚴宮門發表。吳太情深。惡法正盜國奸宗。蜀無人理。某竊笑君王巾幗。女子英雄。手陳承祚殘書兩冊。牝后有名。悲裴松之補注千條。夫人無傳。此天難補。斷女媧神化之腸。是文若傳。掛吳國宮門之限。銘曰。

雌鳳不隨。雌龍不飛。三分鼎足。一篋當歸。于歸不戀京。大歸不出惡聲。國君外淫。夫人不爭。公安無家。夫

人則守益州有家夫人則走爭國世子劫君王后子龍之膽敢如斗樊口來婚喪家之狗三年不言三年不笑繞吳門者腸倚大井者教戴冠佩劍夫人之孝以智事備則隨以禮事備則歸以仁事備子其子以義事備死則死蟲八蜀腹橫目苟身薰蕕不同器以劉琨妻爲夫人勇而禮不亂仁而禮能斷亡乎亡乎有夫人之德而不能興漢婦人有集英雄有記吳書寥寥蜀書廢桓桓夫人弓刀侍婢

鄰水縣先賢子路顯神碑

梓潼不神夔子無靈於是有蜀賊徐添德者紅巾鼓亂綠林弄兵脅達州九姓之衆攻鄰水斗大之城田單守卽墨而天神下降法和軍江陵而羣神隨行長圍於丙辰垂破於庚申羌蠻三兔之窟合秦楚一蛇之勢成豈特人肝切膽柳下跖之大盜城頭子路刁子都而同名哉守鄰水將宰鄰水令勇則樓煩入壁怯則陳餘棄印城上尸膊地中角鳴叢祠狐鳴而呼火毛人泣城而見精於是讀孝經則漢朝皆笑拜韓信則一軍皆驚如我友甘補堂孝廉冕以達徒七十當瞎巴三千始旗之續蟠於地鐘鼓之音震於天宣父圍匡之日仲由氏結纓之年也時冕以鄉兵萬餘人糧絕冕縊於荒谷懸絕得賊糧鄉兵復振冕以義從五萬人保西鄉八九路百戰艱危五年暴露人謂曲阜有曾參則鷓鴣鼻不入城郭宋君用墨子則輸盤撤其攻具冕勝則爲子思守敗不爲武城去使徐賊負偃王筋骨而來爭聽與霸鈴聲而不懼非勇也不知鳥窮則啄獸窮則攫顏子仁人之言也時有官逼民變之論見邸抄白羽若月赤羽若日季路有勇之氣也昔李靖告華山而呼僕射蕭道顯瞿唐

而見白帝心之感則思禽之制在焉。四埔鄭祈三塗晉祭。蓐收虎爪夢其威。刑天干戚誅其厲。我先賢示夢於鄰水校官也。命以黑旗書子路之神。白堊寫至聖先師之位。當四門插當火器跪如靈姑旌如桑林。飾賊之礮。侈聲箚。賊之圍魚鱗潰者何也。冕抑知寶雞黃蛇之時。崇丕聆隨之神。天淵玉女。礪館神君。巫咸神大而詛楚。杜主鬼小而霸秦。而况石盤虎尾。由也雷精。雞冠猊佩。尼山素臣。乃狐黠畏子路之目。而堂衣犯孔子之門。城破則桓魋樹拔。賊入則金絲堂焚。使其開吾戶。據吾牀。飲吾酒。此城勿守。孰若料虎頭。編虎鬚。免虎口。此跡可走。先賢所爲。蒲弓木戟。子路遺孤仲子楷。以蒲弓木戟。報狐魋殺父仇。見孝子傳。蠡耀蛟奮。仇敵在前。乳虎在後也。某聞天之所輔者德。神之所佑者國。狀成湯伊尹之夢。則晏嬰不伐宋師。廢祝融鬻熊之祀。則夔人終爲楚滅。祿山大盜居軋塋而爲鬪神。周公神兵助隋朝而戰李密。霍神以白衣助唐。王陵以陰兵討賊。卞山救臨汝。項王之士偶如風。大眼寇鍾離。蔣帝之馬蹄盡溼。何必祭子胥以牛酒。祀之推以寒食。元謨救命。空誦觀音之咒。敬則還神。徒殺十牛之劫哉。案唐咸通五年。有黔軍校居宣父廟。每食則薦。每夢則教。見王者衣冠曰。吾孔仲尼也。汝當以更名顯。以殺賊效。以司農卿晉汝之官。以饗宗儒易汝之號。其後蠻寇滅。孔子笑。今冕之戰多甚於彼。而冕之署功辭其報者又何也。冕之言曰。戰五年而滅賊非勇。殺萬人而受賞非仁。方冕受圍於鄰水也。守無韋韞。戰無張巡。婦人則琅邪呂姥。王誕仙。黃婦也。時起於南麓。女子則睦州碩眞。齊王氏。樊女也。以白衣起於襄陽。欲與徐陔合。子不聞順者或亡。逆者或存。盧循禱戰。助水者南康之廟。爾朱入洛。縮波者

灋津之神降靈則有摩醯。出盥則有子文。倘鄴下神兵。不破朱榮之膽。城隍風浪。反助慕容之事。則冕方且之反之策。殿焉能有若之保。稷門人見僕射陂邊。有無數小旗之李衛國。冕不望臨海廟裏。有一州相報之陰子春也。幸而鬼叫狼啼。乘茅將軍出獵之勢。鳴磬響角。藉夏后子赤城之靈。使徐賊五斗道窮。債其鬼卒。八公山木。見此人形。不然則豕狗入曾參之室。河伯陷澹臺之城。冕亦將覆醢而待死。斷纓而無生。天不絕五殘六賊。昭明咸漢之妖。國不宜養黎軒幻人。木熙偃子之兵。墨吏播虔而虎冠。兵官干揲而膽青。險不使俎豆疊宮之司寇。脫冕微行而出走。燔臺率爾之仲山。三都一怒而墮邨。我爲子說。子爲我銘。銘曰。

隣水之圍。掘鼠煮弩。有睢陽危。無玉壁固。冕也。斷顏回之劍。絕曾參之火。如子路氏拜拯溺牛。暴馮河虎。制虎者頭。扼虎者喉。戎山顯神。至於韞邱。時惟仲由使有若三百人之中。焚遍踰溝。冉求用矛。勝兵八百。養徒三千。縞衣白冠。端木氏陳說其閒。如甘興霸。如魯仲連。贈顏回少師。贈曾參少保。子路行行。司空一轟。何居乎窋子賤之一琴。冕抱之而終老。

漢高安侯董賢廟碑

讀漢書至董偃令終。鄧通強死。未嘗不廢書歎也。醋離小忌。乃積怒於青宮。含桃餘甘。不操刀於太子者。豈無術哉。予登華山。遍遊秦中。求唐陵碑版。至杜鄠。見有漢高安侯董賢廟焉。塹垣聿興。棖桷旃飾。曰異

哉。此道州有鼻之祠。常山董卓之廟乎。曹操廟於夷陵。而申屠撤之。王敦像於武昌。而溫嶠去之。此無怪秦檜之血食於溫。吳元濟之俎豆於蔡也。遂下馬。見堂廡樹碑。大書以辨哀帝臥起之妄。其文甚美。因揖神而告曰。嗚乎聖卿。君侯奚見辨之小也。君臣魚水。何鯁鯁於臥起不臥起哉。昔馬援與隗囂同臥。魯肅與孫權同榻。關張國士也。於先主同牀。衛霍大將也。而茂陵外壁。爲大臣者咸幸臣一星之恩。割袖藉眠之愛。內平四母之爭。外攘五侯之橫。撤簾而太后入於雲臺。徙薪而將軍止於畫室。一河帶礪。九廟磐桑。雖首枕帝膝。股加帝腹。良史美談也。而彪固不爲君侯佳傳者。以侯有大司馬之權。不早除一王莽爾。莽不奪侯之印。則新都之功不侯。莽不斲侯之棺。則丁傅之屍不戮。是君侯假司馬。而新莽眞皇帝也。侯自謂居高位。蒙盛寵。不害一士大夫。誠盛德也。然某竊爲侯罪也。侯不請斬馬尙方之劍。殺張禹。乞養牛上尊之酒。殺孔光。釐纓白冠。槃水而賜巨君。而侯公賓漸臺。漢不得厝太山之安矣。謂侯無罪。某請以有罪數侯可乎。漢郎侍中官。皆傅粉貝帶冠鵷鷺。而侯傳漏黃門。不奢領脩裘。衣小袖。不敬其罪一。延年始幸。僅給事狗監。新聲協律。而聖卿初拜。卽駢馬都尉。侍中驂乘。不讓其罪二。秬侯以弄兒壯大。擁項而誅之。而董恭以男妾國奢。尻帶而貴之。不孝其罪三。淳于亂長定宮。不謹身與嬖外交。而昭儀入椒風舍。且旦夕與妻上下。不別其罪四。鄧氏布天下錢。死不着身一簪。而縣官沒董氏財。賣且四十億萬。不忠其罪五。韓嫣徒以先趕副車。江都王驚爲天子。而高安乃以後穿登天。麒麟殿傳爲堯舜。不道其罪六。富平儀比